

**БОСНА И ХЕРЦЕГОВИНА
ПАРЛАМЕНТАРНА СКУПШТИНА
БОСНЕ И ХЕРЦЕГОВИНЕ**

**ДОМ НАРОДА
ПРЕДСТАВНИЧКИ ДОМ**


Зajедничка комисија за одбрану и безбједност
Босне и Херцеговине



**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE**

**DOM NARODA
PREDSTAVNIČKI DOM/ZASTUPNIČKI DOM**

Zajednička komisija za odbranu i sigurnost
Bosne i Hercegovine
Zajedničko povjerenstvo za obranu i sigurnost
Bosne i Hercegovine



Broj: 03/1-50-14-7-17/25

Sarajevo, 13. 11. 2025.

ČLANOVIMA ZAJEDNIČKE KOMISIJE ZA ODBRANU I SIGURNOST BiH:

JASMINU IMAMOVIĆU, MARINI PENDEŠ, DARKU BABALJU, MILANU DUNOVIĆU, SLAVKU MATIĆU, ŽELIMIRU NEŠKOVIĆU, SANJI VULIĆ, ŠERIFU ŠPAGI, KEMALU ADEMOVIĆU, SREDOJU NOVIĆU, ZDENKU ĆOSIĆU, SAFETU SOFTIĆU

PREDMET: Informacija o učešću na radnom sastanku članova Zajedničke komisije za odbranu i sigurnost BiH s članovima Odbora za odbranu i Odbora za unutrašnju politiku i nacionalnu sigurnost Hrvatskog sabora i predstavnicima RACVIAC-a

Predsjedavajući Zajedničke komisije za odbranu i sigurnost BiH Jasmin Imamović, član Zajedničke komisije Slavko Matić i parlamentarni vojni povjerenik BiH Boško Šiljegović učestvovali su 11. novembra 2025. godine u Zagrebu na radnom sastanku s rukovodstvom Odbora za odbranu Hrvatskog sabora, na čelu s predsjednikom Odbora Arsenom Baukom i potpredsjednikom Antom Deurom, i predsjednikom Odbora za unutrašnju politiku i nacionalnu sigurnost Hrvatskog sabora Rankom Ostojićem, te sa zamjenikom direktora Centra za sigurnosnu saradnju u Jugoistočnoj Evropi (RACVIAC) kontraadmiralom Predragom Stipanovićem i predstavnikom Misije OSCE-a u BiH.

Radni sastanak, održan u prostorijama Hrvatskog sabora, organiziran je s ciljem razmjene korisnih informacija i praksi te započinjanja priprema za organizaciju godišnjeg sastanka predstavnika parlamentarnih odbora za odbranu i sigurnost država Jugoistočne Evrope, koji će, prema planu, sredinom 2026. godine biti održan u Zagrebu, u zajedničkoj organizaciji Hrvatskog sabora i RACVIAC-a.

U svom obraćanju predsjedavajući Zajedničke komisije za odbranu i sigurnost BiH Jasmin Imamović podsjetio je da je Zajednička komisija, u saradnji s RACVIAC-om, bila domaćin posljednja dva godišnja sastanka parlamentarnih odbora za odbranu i sigurnost država Jugoistočne Evrope, održanih 2017. i 2024. godine u Sarajevu. Prenoseći iskustva iz organizacije ovih skupova, Imamović je istaknuo značaj kontinuirane regionalne saradnje u suočavanju s aktuelnim globalnim i regionalnim sigurnosnim izazovima.

Imamović je naglasio da ovakvi sastanci predstavljaju značajan doprinos izgradnji međusobnog povjerenja i jačanju kapaciteta za demokratski nadzor nad sektorima odbrane i sigurnosti. Istaknuo je da se kroz dijalog i saradnju dodatno osnažuju parlamentarne institucije kako bi mogle efikasnije odgovoriti na savremene sigurnosne izazove. Dodao je da Zajednička komisija za odbranu i sigurnost BiH i Parlamentarna skupština BiH ostaju na raspolaganju organizatorima predstojećeg godišnjeg sastanka u Zagrebu za svaku vrstu tehničke i organizacione podrške.

Učesnike sastanka pozdravili su predsjednik Odbora za odbranu Hrvatskog sabora Arsen Bauk i predsjednik Odbora za unutrašnju politiku i nacionalnu sigurnost Hrvatskog sabora Ranko Ostojić. Predsjednik Odbora za odbranu Arsen Bauk osvrnuo se na dosad održane godišnje sastanke parlamentarnih odbora za odbranu i sigurnost država Jugoistočne Evrope, među kojima i na onaj posljednji, održan u Sarajevu 2024. godine, ističući da su takvi susreti dragocjena prilika za razmjenu iskustava i dobrih praksi, naročito u trenutku kada je fokus u cijeloj Evropi usmjeren na pitanja odbrane i sigurnosti. Također je upoznao učesnike s aktivnostima i koracima koje Republika Hrvatska preduzima s ciljem jačanja vlastitih odbrambenih kapaciteta. Predsjednik Odbora za unutrašnju politiku i nacionalnu sigurnost Ranko Ostojić naglasio je da je sigurnost Bosne i Hercegovine važna i za sigurnost Republike Hrvatske, te istaknuo da sastanci poput ovog daju značajan doprinos jačanju međusobne saradnje i izgradnji zajedničke sigurnosti u regionu.

U nastavku je održana rasprava na kojoj je bilo više riječi o modalitetima parlamentarnog nadzora nad sigurnosnim i vojnim sektorom u Bosni i Hercegovini i Hrvatskoj, poteškoćama s afirmacijom vojnih zanimanja za mlade ljude i ranim penzionisanjem vojnih lica te važnosti osiguranja boljih statusnih i materijalnih uslova za zaposlene u vojnom sektoru.

Član Zajedničke komisije Slavko Matić je u svom obraćanju naglasio da je od krucijalne važnosti za popunjenost oružanih snaga osigurati materijalni status osobama u uniformi i zaštitu njihova prava. Samo na taj način će se zaustaviti odliv kadrova i promovirati vojni poziv.

Parlamentarni vojni povjerenik BiH Boško Šiljegović upoznao je prisutne s nadležnostima i aktivnostima institucije parlamentarnog vojnog povjerenika, ističući da je riječ o jedinstvenom mehanizmu parlamentarnog nadzora uspostavljenom po uzoru na praksu Bundestaga, koji značajno doprinosi zaštiti ljudskih prava pripadnika Oružanih snaga BiH.

Kontraadmiral Predrag Stipanović, zamjenik direktora RACVIAC-a, osvrnuo se na ulogu Centra u povezivanju parlamenata i njegovu misiju održavanja dijaloga između zemalja JIE s ciljem postizanja sigurnosti. Istaknuo je i važnost instrumenta parlamentarnog nadzora koji treba omogućiti zastupnicima bolji uvid u ovu problematiku, prije donošenja zakonskih rješenja. Iznio je i pojedinosti u vezi s organizacijom predstojećeg godišnjeg sastanka u Zagrebu, o kojima je razmijenio mišljenja s članovima delegacija.

Predstavnik Misije OSCE-a u BiH naglasio je da OSCE kontinuirano podržava jačanje demokratskog nadzora i transparentnosti u odbrambenom i sigurnosnom sektoru, što predstavlja važan segment ukupnog mandata ove međunarodne organizacije u BiH.

Nakon ovog sastanka, u Hrvatskom saboru održan je i godišnji sastanak službenika parlamentarnih komisija, te predstavnika RACVIAC-a i Misije OSCE-a u BiH, na kojem je razgovarano o tehničkim detaljima i organizaciji predstojećeg godišnjeg sastanka.

Predsjedavajući Zajedničke komisije
Jasmin Imamović

Dostavljeno:

- naslovu
- a/a

